



S.V.Volvox ta perde un otro pilar: Margo Penja



Nos organizacion deportivo S.V.Volvox ta participa e tristo noticia di a perde un di su fundadornan y alavez un gran miembro honorario esta sra. Maria Margaritha Penja, mihor conoci como Margo.

Sra. Margo semper a forma parti di directiva den S.V. Volvox y sigur un di su funcionnan mas principal ta busca donacion pa su team tan stima S.V.Volvox. Sra. Margo semper a gusta e deporte di korfbal.

Den su añanan di hubentud el'a hunga korfbal pa e team di Jong Sta. Cruz.

Mas despues el'a milita den Aru-korf y esaki a sosode te cu 1978. Na 1979, Margo hunto cu su casa Betto Penja, tambe Guillermo Figaroa hunto cu su casa Tanta Berta (q.e.p.d) y Carmen Semeleer (q.e.p.d) a dicidi di lanta un otro team di korfbal den St Cruz, esta S.V.Volvox, pero semper cu e idea pa por haci mas deporte, ta pesey mes a traha e statuut na un sportvereniging. Sra. Margo hunto cu su otro fundador ariba menciona, antes tabata pasa cas pa cas pa pidi na mayornan pa laga nan yiu bin hunga korfbal. Nan carisma y nan forma di ser y confianza tabata laga hopi mayornan laga nan yiu bin train korfbal riba e veld di S.V.Volvox na Papilon.

Poco poco Margo a bira e mama pa hopi miembro di S.V. Volvox y su aspiracion y dedicacion tabata pa logra cada biaha mas y mas pa su team.

E tempo nan aya ta sponsor tabata manda y Margo tabata e cara di Volvox na e comerciantenan. Cada biaha su pidimento tabata pa logra mas pa su team S.V.Volvox. Asina S.V. Volvox tabata logra su materialnan di korf, bala, tin ora hasta uniform pa su team. Tabata tin un biaha cu Margo a logra un back-stop masha grandi mes pa e team di Softball di S.V.Volvox. Sra. Margo tambe a contribui hopi ora cu S.V.Volvox tabata bay hunga wega nan interinsular na Corsou y sin conta e cantidad di viahe nan cu nos di S.V.Volvox a haci pa Bonaire. Asina nos por sigui menciona hopi cos cu sra.Margo a logra pa su team. Na cas di sra. Margo y sr.

Betto Penja tabata e "club huis" pa nos team di S.V.Volvox. Ey nan tabata tin fiesta di Pasco, eynan ta prepara pa venta di cuminda y warda cos pa vlooiemarkt, reunionnan general, asina nos por sigui menciona tur cos nan cu sra. Margo a percura pa su team. Nos di S.V.Volvox ta convenci cu sra.Margo su guia, su conseho, su norma y balornan, a logra sigur atraves di aña di pone hopi hoben awe homber y

muhernan grandi den e bon caminda.

Na 1994 S.V.Volvox a dicidi di nombra sra.Margo hunto cu sr.Betto y sr. Guillermo y sra. Bertha (q.e.p.d.) como miembronan honorario na nan team S.V. Volvox. Kizas sra. Margo no a logra su condecoracion di su Majestad, pero nos di S.V.Volvox ta sigur cu e lo haya su condecoracion Celestial.

Su guia como dirigente deportivo ta ehempel con mester traha y dedica tempo na deporte y na hobennan. Por ultimo nos di S.V.Volvox ta pidi tur nos miembronan, ex miembronan cu durante e ultimo 32 añanan cu por a pasa den nos team, pa compania nos diamars awor pa e ultimo lugar di descanso. Cu Margo sosega na Paz.

Na nomber di directiva y tur miembronan di S.V.Volvox, Ruben Krozendijk, Presidente S.V.Volvox

